

Corieris, camions e camioniscj di Romans



Una coriera plena di bontât

Zorz Gallas (1927 - 1993)

Di Zetul a Sponton, di Cabas a Zanin, di Licinio a “Pieri motôr” fintremai a “Cinoto”. Come a dî che Romans al è simpri stât un paîs di corieraros (corierârs?) e autotrasportadôrs, camioniscj o sofêrs, come che si diseva fin a cualchi timp fa. Int lavoradora, che i à simpri plasût tirâ lis orelis par sintî rombâ il motôr, cussì come che e à simpri gjoldût alçant il “cofano” par controlâ se dut al fos a puest. Int amanta da lis machinis e dai motôrs, in definitiva, che e à passât la vita a fâ zirâ il menul par vuadagnâsi il pan, intant che cualchidun altri, come che no fossin bastadis lis tantis oris passadis sul camion, magari strac, stuf e cuasi cjoc di lavôr, al si prestava a menâ ancjemò -il stiarz- par regalâi un moment di serenitât e gjonda a chês personis, e fruts in particolâr, che la vita cun lôr no jera stada di sigûr massa gjenerosa. Un di chescj al è stât il complant nestri paisan Zorz Gallas, nassût a Triest ai 16 di Mai dal 1927, che prima da vuera al veva lavorât a lis dependencis da dita Matirolî, e che a la fin dal grant conflit al si veva comprât un camion inglês, metint cussì in pîts una piçula dita di autotraspuarts, onorant daspò chê profession fin cuasi ae di da sô muart, vignuda ai 4 di Avost dal 1993. Il nestri Zorz al à simpri vût un voli di rivuart par dutis chês robis che a interessavin il ben da nestra int e dal nestri paîs, tant e je vera che intai prins ains Setanta, insiemit cun altris camioniscj dal lûc, tra chescj ancja il puar “Cinto”, si è prodigât par puartâ via duta chê tiera che jera stada rumada in via Racojan intal moment che si veva decidût di meti in pîts il cjamp San Bastian. Intal 1976, invece, Zorz

Gallas, judât e sostignût da Dorina, la femina che al veva sposât ai 30 di Zenâr dal 1957 inta glesia di Romans, a à fondât il “Centri Sociâl Incuintri”, tirant fûr di lôr sacheta ben 10 milions di liris, par podê comprâ una coriera di seconda man da dita “Petruz” e cun chê a à scomençât a puartâ atôr, domenia dopo domenia, lis personis disabilis di dut il nestri circondari. Personis che a vignivin compagnadis di chei volontaris dal nestri paîs, tra chescj o dovìn segnalâ ancja il sindic “Ginuti” e don Adelchi, che si sintivin di dâi una man par sostignî la lôr nobil causa. Coriera che, bisugna ancjemò zontâ, e je stada paiada nome dopo un an, grazie ai tancj contribûts che a Zorz e a la Dorina i jerin rivâts da banda di duta la int di Romans. Coriera che daspò e je stada metuda a disposizion di dutis lis associazions dal nestri paîs, in mût che a podessin dâi cuarp a lis lôr iniziativas. Cualchi an dopo, grazie sorendut al interessament di don Miniussi, il Centri Sociâl al podê usufruî dai locâi dal Istitût Duca d'Aosta di Gardiscja, indulà che i fruts a vignivin ospitâts, assistûts e puartâts ogni di atôr cu la coriera, al mâr, in montagna e in tancj altris lûcs, guidada no dome dal nestri Zorz, ma ancja di tancj altris sofêrs di Romans, che a vevin capît la impuartança dal spirt che al animava Zorz e la Dorina. E cussì, intal moment che il grop “I Scussons” al à decidût di dedicâ il so lunari pal 2007 ai camioniscj di Romans, il nestri pinsîr al è curût dibot, cun afiet e agrât al puar Zorz Gallas, sença però dismenteâsi dai tancj autiscj di Romans che i àn dât il cambi. Un grazie di dut cûr, i rivolzìn in chesta ocasion al puar Zorz, par vê metût la sô profession al servizi da int plui debila e tant bisugnosa di aiût.

Edo Calligaris